



E TORNE A SVOLÂ LA ACUILE DAL FRIÛL INSIEMI CUL UDIN

**Tal moment che si invie il campionât di balon, i auguris e
lis sperancis dal president de ARLeF, Eros Cisilino**

«O ai ancjemò iniment la coreografie che i tifôs dal Udin de Curve Nord a àn organizât tal Stadi Friûl te ocasion de partide cul Empoli, zuiade ai 7 di Avrîl passâts, te stesse zornade che a Gurize a jerin lis celebrazions uficiâls de Fieste de Patrie dal Friûl (partide vinçude dai blancs e neris cul risultât finâl, scombatût, di 3 a 2) - al dîs il president de ARLeF (Agenzie Regionâl pe Lenghe Furlane) -. In chê ocasion i tifôs a vevin disrodolade e animade une acuiile zale (fate di trê draps), simbul storic de Patrie dal Friûl, suntun mâr di têt blu (cu la scrite par furlan in ricuart de nassite dal stât patriarcjâl, ai 3 di Avrîl

dal 1077), grande plui di 320 metris cuadris. Un impegn apassionât e apassionant che al à fat ben ae squadre e a dut il teritori regionâl. Un teritori che, a nivel talian e internazionâl, al ven rapresentât ben dal Udin, la nestre squadre di balon plui rapresentative a nivel di risultâts otignûts. Ancje cussì si è vignude a creâ, forsit, une piçule mutazion gjenetiche che e à viodût diventâ simpri plui “piçul” il simbul ecuiv de squadre, la zebre, cun chel alât, simpri plui “grant” de acuiile. Un teme no di pôc - al va indevant Cisilino -, che al è in linie ancje cun ce che al sucêt in altris regjons li che si fevelin lenghis minorizadis e o pensi, par esempli, al Gales e ae Catalogne, soregut. Lûcs dulà che lis scuadris di balon locâls a son ad implen part de identitât populâr. Al sarès biel, alore - al augure il president - che ancje su lis maiutis dai zuiadôrs dal Udin (almancul suntune des trê regolamentârs), al fos cualchi riclam grafic ae Patrie dal Friûl e ai siei colôrs storicis: il blu e il zâl. Cun di plui, o crôt che ancje i tancj tifôs che i stan daûr e a incitin la squadre, intai siei impegnis in cjase e in trasfierte, a vedin di vè un ricognossiment just par chest leam che, intai agns, nol è mai lâit in

mancul e al à judât dal sigûr, tant che decim secont zuiadôr in cjamp, tal rivâ al travuart des 25 stagjons in Serie A! Ancje par chest, la ARLeF, daurman dopo de partide cul Empoli, e à volût premiâ l'impegn e la passion dai tifôs cuntun ricognossiment simbolic, consegnât intune cerimonie semplice che si è davuelte a Udin, te sede de Agenzie. Une targhe che e à sotlineât la braüre di apartignince al Friûl e ae sô lenghe dimostrât dai Ultras 1995 e di dute la Curve Nord. Duncje, - al conclût Cisilino - Fuarce Udin! E tancj auguris par un campionât plen di sucès e di sodisfaziions».

Adriano Del Fabro

